

AKASHVANI AIZAWL

REGIONAL NEWS BULLETIN

HEADLINES (MORNING)

1. Larsap General (Rtd) Vijay Kumar Singh leh Nupui Pi Bharti Singh chuan nizan khan Lok Bhavan-ah Aizawl West-I Area Masihi Sangati, Mizoram Presbyterian Church member-te mikhualin Christmas Carol Service hun hlimawm tak an hmang.
2. India leh Bangladesh inrina hrula venhimna hna chak zawka thawh a nih theihna tura Kawrpuichhuah lei dawh chu hun rei tak chawhhsan a nih hnuah hnathawh chhunzawm a ni.
3. Education Minister Dr Vanlalhlana'n kumin November thla atangin Casual Teacher hlawh an tih pun thu a sawi.
4. Prime Minister Narendra Modia chuan vawiinah West Bengal a tlawh dawn.

<><><>

**LOK BHAVAN CHRISTMAS CAROL SERVICE**

Larsap General (Rtd) Vijay Kumar Singh leh Nupui Pi Bharti Singh chuan nizan khan Lok Bhavan-ah Aizawl West-I Area Masihi Sangati, Mizoram Presbyterian Church member-te mikhualin Christmas Carol Service hun hlimawm tak an hmang.

Larsap General chuan Christmas chu mitin huapzo leh hmun tina ngaihhlut hlawh a nih thu sawiin, he hun hi thinlung kawngkharte hawnga midangte tana malsawmna ni tura luanchhuahna, sum leh pai mai ni lo neih thil remchang hmanga phal taka midangte tanpuina hun a ni, a ti a. Khawngaihna leh lainatna lanitirna hun a nih thu sawiin, zonun zemawi Tlawmngaihna a kentel tlat avangin Christmas leh Mizo khawtlang nun chu inhme a tih thu a sawi a. Larsap chuan Christmas lo thleng tur chuan remna leh muanna bakah inunauna thlen se a duh thu a sawi bawk.

He hunah hian Rev Lalhunthara, i/c Aizawl West Area Masihi Sangati hnen atangin thuchah ngaihthlak a ni a. Aizawl West-I Area Masihi Sangati, Mizoram Presbyterian Church member leh Standing Choir te'n Krismas hla mawi tak tak an rem a. Larsap te nupa hnenah Krismas thilpek an hlan a. An ni pawhin he hun hmanpuitu Aizawl West-I Area Masihi Sangati member-te chungah lawmthu sawiin Krismas thilpek an hlan a ni.

<><><>

**CM**

Chief Minister Pu Lalduhoma'n tun hnaia rampum huap Police hotute intawhkhawmna-a hmasawmna tur rawtna zingah Mizoramin a taka kalpui tawh tamtak a nei a ti.

He thu hi Mizoram Police hmunpui, Aizawl Khatla tlanga nimina Police hotute intawhkhawmna hunah sawiin Pu Lalduhoma chuan Police Modernisation Scheme hnuaiah cheng vaibelchhe 3.18 an hmuh bakah, a belhna additional fund atan cheng vaibelchhe 21.276 chu sorkar laipuiin a pawmsak thu a sawi a, pawisa an hmuh atangin Mizoram Police mamawh tam tak lei tum anih bakah silaimu kah tlang theih loh Bulletproof motor pawh pathum lei an tum thu a sawi bawk.

Chief Minister chuan Mizoram sorkarin police-te hmasawmna tur ruahmanna a neih tlangpui tarlangin a langsar zual chu India dan thar BNSS Act 2023-in a phut ang a Directorate of Prosecution dinna tur hriattirna a nih thu sawiin hei hi theihtawp a an bawhzui thu a sawi bawk.

He huna thusawitu dang Home Minister Pu K. Sapdanga chuan, Police hna chu misual hrem tuma beihna a ni ringawt a nih loh thu leh vantlang nun him leh ralmuang siamna zawk a nih thu a sawi a, tun

hma atanga dan bawhchhiatna panggaite vil reng chung a dan bawhchhiatna tharlam leh tunlai ami hmachhawn thei turin Mizoram police hotute a chah a, Police hnathawh tha tak avangin ram him an nih phah a ti bawk.

Nimin Mizoram Police hotute intawhkhawmna hun hi kumin November thla a India ram pum Police Hotute inhmuhkhawm tum 60 na bawhzuina kal zel a ni.

<><><>

## **KAWRPUICHHUAH**

India leh Bangladesh inrina hrula venhimna hna chak zawka thawh a nih theihna tura Kawrpuichhuah lei dawh chu hun rei tak chawhlsan a nih hnuah hnathawh chhunzawm a ni.

Kawrpuichhuah lei hi Sorkar laipui Ministry of Home Affairs sum cheng vaibelchhe 38 senga dawh a ni a, lei hi metre 204-a sei, metre 5.5-a zaua siam tur a ni a, lei dawh hna hi kumin fur ruahsur nasa vang khan chawhlsan a ni a, hun rei tak hna kal lai tihawp a nih hnuah hmanraw mamawh hrang hrang lakkhawm niin, tunhnai khan chak zawka hnathawh chhunzawm leh a ni.

Kawrpuichhuah lei dawh hi Central Public Works Department-in an vil a, tun dinhmunah hna thawh tur zaa 25 vel thawh zawh a ni tawh.

<><><>

## **EDUCATION MINISTER**

Education Minister Dr Vanlalhlana'n kumin November thla atangin Casual Teacher hlawh an tih pun thu a sawi.

Nimin zirtawpin khan MSU General Headquarters hruaitute chuan Education Minister a Pisa-ah an hmu a, Casual Teacher chungchang sawipuiin Dr Vanlalhlana chuan Casual Teacher chungchanga MSU hmalakna chu Sawrkarin a ngaih pawimawh thu leh, chak taka hma an lak zel thu a sawi a. MSU in an ngenna anga Casual Teacher hlawh pawh November thla atanga an tihpun tawh thu a sawi a. Hei bakah hian Mizoram puma Zirtirtu indaihloh puhruk nan Casual Teacher 234 leh LDC 30 lak thar tura Advertisement chu nimin December ni 19 ah an tihchhuah thu a sawi a ni.

MSU hruaitute chuan, Education Minister in zirna tihhmasawmna tur leh thawktute indaihlohna ti ziaawm tura a hmalakna ah lawmthu an hrilh a. Casual Teacher leh LDC lak thar tur Mizo thalaite ngaihven turin an chah nghal bawk a ni.

<><><>

## **HEALTH MINISTER**

Health Minister Pi Lalrinpuii'n Mizoram Universal Health Care Scheme ah inziak lut an pung zel a ti a, a chhawr tawh ten an fak tih sawiin kum 2026 April thla ah inziah luh tharna hun hawn ani leh dawn tih a sawi.

Lungleia Regional Vaccine Store nimina a hawmna ah he thu hi a sawi a, Health Minister chuan Mizoram Universal Health Care Scheme ah inziak lut an pung zel tih sawiin a chhawr ten man hla an ti hle a ti a, MUHCS tihchangtlun kawngah theitawpin hma an la zel dawn tih sawiin nakum April thla ah inziah luh leh theih ani dawn tih a sawi.

Pi Lalrinpuii chuan Lungleia Regional Vaccine Centre hawn chu bung thar kaina a nih thu sawiin, Lunglei chhehvel district hrang hrang Lawngtlai, Siaha leh Hnahthial District te'n hmun hnai zawk Lunglei atanga vaccine sem tur an la thei tawh tur chu lawmawm a tih thu a sawi a. Mizoram sawrkarin hmasawmna rualkhai zawk a awm theih nan thu neihna sem zai a kalpui a, hmun hrang hranga sawrkar hma lakna khairual taka kalpui a tumna rah chhuah chu State University hmun tur chungchangah lang tawhin, tunah Regional Vaccine Store chungchangah a lo lang chhuak leh ta a ni, a ti a. Lungleia vaccine dah thatna tur RVS hawn chuan chu harsatna chu a pumpelth tir tur thu a sawi.

Minister chuan Health Department-in damlo enkawl bakah invenna lam nasa takin a kalpui reng tih sawiin, National Health Mission hma lakna zawng zawng leh Directorate of Health Services hma lakna pui ber chu natna laka inven leh hriselna kawng inzirtir (a nih thu a sawi a. Damdawi in tha tehnaa hma sawn

turin damdawi in lian ber atanga sub-centre thlengin a tihfai leh tihthianghlim kawngah nasa taka hma lak a nih thu mipuite chu khaw tin leh veng tina sub-centre-te hmang tangkai a, a thlawna damdawi lak tur awmte chhawr tangkai turin a chah a ni.

**(Thanghmingliana Renthlei PTC Lunglei)**

<><><>

**AIR NEWS ON SOCIAL MEDIA**

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Wawiin chawhnu dar 2 leh a chanve-ah Chanchinthar puan leh a ni ang.

<><><>

**PHE MINISTER**

PHE Minister Prof Lalnilawma'n hunpui lo thleng turah mipuiten tui hnianghnar tak an dawn theih nan Department in theitawp a chhuah a ti a, rokhawlhna lian a thleng anih loh chuan tui hnianghnar taka mipuiten an dawn tur thu a sawi.

Nimin khan hunpui lo thleng tur atana inbuatsaih nan Public Health Engineering Department changtu Minister Prof. Lalnilawma hovin PHE Department hotute nen Aizawl khawpui tui dinhmun thlir a ni a, Minister chuan Krismas leh Kumthar lo thleng turah tui harsatna a awm loh nan theitawp an chhuah tih sawiin tun dinhmunah Aizawl khawpui hmar lam kohhran hrang hrang 208-ah leh chhim lam kohhran hrang hrang 138-ah Krismas tui pek an nih tawh thu sawiin, hunpui lo thleng tur atan PHE department chu a inpeih a ti a; rokhawlhna lian tham a thleng a nih loh chuan mipuite'n tui hniang hnar tak an neih tur thu sawiin, hlim tak leh thlamuang taka krismas leh kum thar hmang theuh turin mipuite duhsakna a hlan a ni.

**(DIPR)**

<><><>

**FISHERIES STATISTICS**

Mizoram Fisheries department-te chhinchhiah danin Mizoram chhungah sangha dil 19,809 a awm mek.

Mizoram sorkar chhinchhiah danin sangha dil 19,809 atang hian kum 2023 atanga 2024 chhungin sangha tonn 5720 leh kg 89 tharchhuah a ni a, sangha dil hi a zau zawng a vai a belhkhawmin hectare 5888 ang a chhinchhiah a ni bawk.

***Kan correspondent report i lo ngaihthla ang :***

***Voicecast***

*Mizoram Fisheries Department-te chhinchhiah danin Mizoram chhungah mimal leh society hatchery 10 a mek a hei bakah hian sorkar hatchery 4 a awm mek bawk. Kum 2023-24 chhunga sangha chi tharchhuah zat chu nuai 200 chuang ni a chhinchhiah niin sangha chi Mizoram in a a mamawh zat erawh nuai 471 vel ni a chhut a ni bawk.*

<><><>

**PM**

Prime Minister Narendra Modia chuan wawiinah West Bengal a tlawh dawn. PM Modia hian cheng vai belchhe 3200 senga siam National Highway project pahnih a hawna leh lunphum phumna hun a hmang dawn a ni. Pu Modia hian Nadia District-a Barajaguli-Krishnagar inkar km 66.7 a thui National Highway 34 na a hawng awn a. Hei bakah hian North 24 Parganas district-a Barasat-Barajguli inkara Natinoal Highway km 17.6 a thui siamna tur lung a phum bawk ang. He project hian Kolkatta leh Siliguri inkar a thlunzawm dawn a.

**(NewsonAIR)**

<><><>

**PARLIAMENT**

Parliament thlasik thutkhawm chu nimin khan tiam chin awm lova tihtawp a ni. Tun tum Paliament thlasik thutkhawm hi ni 19 chhung neih a ni a. Lok Sabha Speaker Om Birla chuan tun tum thutkhawma house rorel hlawk dan chu zaa 111 anih thu sawiin tum 15 an thukhawm a ti a. Rajya Sabha Chairman CP Radhakrishnan chuan darkar 92 chhung house ah tha taka rorel anih thu sawiin an hnathawh hlawk dan chu zaa 121 a tling a ti. Pu Radhakrishnan chuan Vande Mataram hla kum 150 na tlin pualin abika sawihona hun hman anih thu a sawi a. Member 82 laiin an sawi tih a tarlang bawk a ni.

**(NewsonAIR)**

<><><>